



Broj: 05/1-50-14-51-19/11

Sarajevo, 27.9.2011.

ZAPISNIK

19. sjednice Nezavisnog odbora kao nezavisnog tijela policijske strukture BiH

Sjednica je održana 27.9.2011., s početkom u 10 sati.

Sjednici su prisustvovali članovi Nezavisnog odbora: Žiko Krunić, Mato Jozić, Dragan Savić, Ljubomir Kuravica, Enes Obralijski, Viktor Dadić i Zijad Kadić.

Prvi zamjenik predsjednika Bakir Dautbašić i član Odbora Stanko Nuić bili su opravdano odsutni.

Sjednici je prisustvovala Alma Salkić-Mijić, koja je obavljala poslove sekretara Nezavisnog odbora.

Sjednicu su pratili: Dijana Šatara i Senad Zlatar iz OHR-a, Fatima Miletić iz EUPM-a i Zoran Brkić iz Sektora za odnose s javnošću Parlamentarne skupštine BiH.

Sjednicu je sazvao Žiko Krunić, predsjednik Nezavisnog odbora. Konstatirao je da postoji kvorum za rad te otvorio sjednicu. Nezavisni odbor jednoglasno je usvojio sljedeći

DNEVNI RED

1. Usvajanje Zapisnika 18. sjednice Nezavisnog odbora, održane 5.9.2011.;
2. Utvrđivanje teksta Javnog konkursa za provođenje procedure odabira kandidata za izbor direktora Državne agencije za istrage i zaštitu;
3. Dopis Odbora za žalbe građana upućen Nezavisnom odboru;
4. Tekuća pitanja.

Ad.1. Usvajanje Zapisnika 18. sjednice Nezavisnog odbora, održane 5.9.2011.

Predsjednik Žiko Krunić otvorio je raspravu o Zapisniku 18. sjednice Nezavisnog odbora, održane 5.9.2011.

Član Odbora Zijad Kadić imao je primjedbu na Zapisnik koja se odnosila na tačku 2. Dogovor o aktivnostima u vezi s raspisivanjem konkursa za pozicije rukovodilaca policijskih tijela iz nadležnosti Nezavisnog odbora kojima ističe mandat u 2011. godini, gdje je trebalo navesti da je Nezavisni odbor jednoglasno usvojio zaključak da će tri člana Odbora: Enes Obralijski, Viktor Dadić i Ljubomir Kuravica do naredne sjednice utvrditi tekst javnog konkursa.

Zapisnik 18. sjednice usvojen je s primjedbom jednoglasno.

Ad.2 Utvrđivanje teksta Javnog konkursa za provođenje procedure odabira kandidata za izbor direktora Državne agencije za istrage i zaštitu

Predsjednik Nezavisnog odbora Žiko Krunić podsjetio je članove Nezavisnog odbora da su prijedlog teksta Javnog konkursa, dostavljenog uz dnevni red, pripremili članovi Nezavisnog odbora Enes Obralijski, Ljubomir Kuravica i Viktor Dadić u skladu sa zaključkom sa 18. sjednice, održane 5.9.2011.

Otvorio je raspravu o prijedlogu teksta Javnog konkursa.

U raspravi su učestvovali svi članovi Nezavisnog odbora. Usvojene su određene izmjene u odnosu na predloženi tekst, tako da je u preambuli kao pravni osnov potrebno navesti član 59. Zakona o policijskim službenicima BiH i čl. 2., 3. i 4. Odluke o uslovima i kriterijima za odabir, postupak ocjenjivanja i utvrđivanja rang-liste najuspješnijih kandidata otvorene konkurencije za izbor direktora i zamjenika direktora policijskih tijela Bosne i Hercegovine. U tekstu Javnog konkursa, u dijelu koji se odnosi na Opće uslove, potrebno je brisati tačku e), u tekstu koji se odnosi na posebne uslove potrebno je dodati novu tačku e) koja glasi "e) da nije član političke stranke", u tekstu koji se odnosi na Potrebne dokumente u tački 2. brisati tekst "ili ekvivalent Bolonjskog procesa obrazovanja s najmanje 240 ECTS bodova", u tački 3. brisati tekst "izdatu od CIPS-a", brisati tačku 5. i izmijeniti tačku 9. tako da glasi: "uvjerenje o radnom iskustvu".

Nezavisni odbor odlučio je da se na sljedećoj sjednici izjasni o tekstu Javnog konkursa koji će sadržavati usaglašene izmjene u odnosu na predloženi tekst.

Ad.3. Dopis Odbora za žalbe građana upućen Nezavisnom odboru

Predsjednik Odbora Žiko Krunić podsjetio je članove da je Odbor za žalbe građana uputio dopis Nezavisnom odboru, s predstavkom Safeta Varajića kojom se podnosilac predstavke žali na rad direktora Granične policije BiH i direktora Državne agencije za istrage i zaštitu.

Otvorio je raspravu o ovoj tački dnevnog reda. U raspravi su učestvovali: Žiko Krunić, Ljubomir Kuravica, Mato Jozić i Zijad Kadić.

Članovi Nezavisnog odbora odlučili su da o ovom pitanju konačnu odluku donesu na jednoj od narednih sjednica.

Ad.4. Tekuća pitanja

Član Odbora Zijad Kadić tražio je informaciju o planiranoj studijskoj posjeti članova Nezavisnog odbora institucijama Sjeverne Irske.

Predsjednik Žiko Krunić upoznao je članove Nezavisnog odbora da je aplikacija Nezavisnog odbora za studijsku posjetu institucijama Sjeverne Irske odobrena. U studijsku posjetu putovat će: Mato Jozić, drugi zamjenik predsjednika, Enes Obralijski i Dragan Savić, članovi, i Alma Salkić-Mijić, sekretar.

Član Odbora Zijad Kadić izrazio je svoje neslaganje s načinom na koji je odlučeno o sastavu delegacije.

Sjednica je završena u 12 sati.

Privremeni sekretar
Nezavisnog odbora
Alma Salkić-Mijić

Predsjednik
Nezavisnog odbora
Žiko Krunić